

आकाशवाणी

1. भारतीय जनता पार्टी नै अपने दऊं सांसदें आस्सेआ अदालते बारे कीती गेदी टिप्पणी गी खारज करदे होई आखेआ जे पार्टी उंदे ब्यान कन्नै सैहमत नेई ते नां गै इंदा समर्थन करदी ऐ।
2. पच्छम बंगाल दे राज्यपाल होर मुर्शीदाबाद हिंसा बारे केन्द्र गी रिपोर्ट सौंपगन ते इस मुद्दे गी मुख्मन्त्री हुंदे नै बी पुट्टगंन।
3. अमरीका दे उपराश्ट्रपति जे.डी.वैंस चार दिनें दे दे भारत दौरे पर कल नमीं दिल्ली पुज्जा'रदे न।
4. अमरीका ते ईरान बश्कार परमाणु वार्ता दा दूआ गेड़ रोम च सम्पन्न होई गेआ ऐ।
5. पूरी दुनिया च अज्ज ईस्टर दा ध्यार पारम्पारिक, धार्मिक ते श्रद्धा भाव कन्नै मनाया जा'रदा ऐ। राश्ट्रपति, उपराश्ट्रपति ते होरने केई समाजी, सियासी ते धार्मिक लीडरें लोकें गी ममारकबाद दित्ती ऐ।
6. आईपीएल च जंदी रातीं लखनऊ सुपर जायंट्स नै राजस्थान रॉयल्स गी 2 रंजें कन्नै हराया।

<><><><><><>श

BJP

भारतीय जनता पार्टी नै पार्टी सांसद निशीकांत दूबे ते दिनेश शर्मा हुंदे आस्सेआ सुप्रीम कोर्ट ते भारत दे प्रधान न्यायधीश हुंदे बारे कीती गेदी टिप्पणी गी सिरे थमां खारज करदे होई अपने आपै गी एह्दे शा बक्ख करदे होई गलाया ऐ जे पार्टी उंदे ब्यान कन्नै सैहमत नेई ऐ। पार्टी नै अपने इनें दौनें सांसदें गी इस चाल्ली दी ब्यानबाजी नेई करने दी ताकीद बी कीती ऐ। अपनी इक सोशल मीडिया पोस्ट च पार्टी दे राश्ट्रीय प्रधान जे.पी.नड्डा होरें आखेआ ऐ जे बीजेपी नां ते इनें ब्यानें कन्नै सैहमत ऐ ते नां गै इंदा समर्थन करदी ऐ। नड्डा होरें अग्गे आखेआ जे बीजेपी नै न्याह पालिक दा म्हेशां आदर कीता ऐ ते अदालते जेह्ड़ा बी फैसला सुनाया जां कोई सुझाह दित्ता, पार्टी नै उसी सिर मत्थे स्वीकार कीता ऐ। उनें आखेआ जे बीजेपी दा मन्नना ऐ जे सब्बै अदालतां साढे लोकतंत्र दा इक अनत्रुट्ट हिस्सा न ते संविधान गी बचाने आले मजबूत थम्म न।

<><><><><><>श

WB Governor

पच्छम बंगाल दे राज्यपाल डॉ. सी.वी.त्र आनंद बोस होरें आखेआ ऐ जे ओह मुर्शिदाबाद सांप्रधायिक हिंसा बारे मुख्मन्त्री ममता बनर्जी हुंदे नै गल्लबात करगंन ते मुर्शिदाबाद दे जमीनी हालात पर केन्द्र गी रिपोर्ट सौंपगंन। राज्यपाल होरें मुर्शिदाबाद जिले दे अशांत खेत्तरें दा दौरा करने दे बाद एह गल्ल आक्खी। उनें आखेआ जे पीड़िमें पर जालिमाना हमले दी जानकारी मिली ऐ जेहड़ी सम्य समाज च मंजूर नेई कीती जाई सकदी। राज्यपाल होरें आखेआ जे लोकें दी सुरक्षा करना केन्द्र ते राज्य सरकार दी जिम्मेदारी ऐ। उनें एह बी आखेआ जे केन्द्री थेआरबंद बलें दी तैनाती परैत अशांत खेत्तरें च स्थिति च बड़ा मता सुधार होआ ऐ।

<><><><><><>

USVP Visit

अमरीका दे उपराष्ट्रपति जे.डी.वैस भारत दी 4 दिनें दी यात्रा दरान कल नमीं दिल्ली पुज्जा करदे न। वैस हुंदा भारत दा एह पैहला दौरा ऐ। कल ओह प्रधानमंत्री नरेन्द्र मोदी हुंदे नै मलाटी करगंन। उंदा जयपुर ते आगरा जाने दा बी कार्यक्रम ऐ। दौरे दरान दवै मुख्य आपसी सरबंधें च होई दी प्रगति दी समीक्षा करगंन ते भविक्ख च इनें सरबंधें गी होर निग्गर बनाने दे उपाए बारे विचार बंटादरा करगंन। दवै घड़े प्रधानमंत्री मोदी हुंदी अमरीका यात्रा दरान इस ब'रे 13 फरवरी गी जारी भारत-अमरीका दे सांझे ब्यान पर अमलावरी दी समीक्षा बी करगंन ते आपसी हितें दे क्षेत्रीय ते कुल संसारी मुद्दें पर बी सोच बचार करगंन।

<><><><><><>

PM-Saudi Visit

प्रधानमंत्री नरेन्द्र मोदी होर 22 अप्रैल गी सऊदी अरब दी दऊं दिनें दी यात्रा पर जा करदे न। मंगलवारें ओह जेद्दा पुज्जगंन। पिछले 4 दहाकें च कुसै भारतीय प्रधानमंत्री दी जेद्दा दी एह पैहली यात्रा होग। उआं प्रधानमंत्री मोदी 2016 ते 2019 च सऊदी अरब दा दऊं बारी पैहले बी दौरा करी चुके दे न, पर जेद्दा ओह पैहली बारी जांगन। “जेद्दा” शैहर गी समूलची दुनिया दे मुसलमान बड़ा पवित्र शेहर मन्नदे न ते इसी पवित्र मक्का ते मदीना दा दाखली द्वार बी आखेआ जंदा ऐ। एह दौरा दौनें मुल्खें ते उपरोतली निग्गर होंदे सरबंधें दा प्रतीक ऐ जिसलै जे दवै मुख्य दी भेयाली आर्थिक, रक्षा ते सांस्कृतिक सैहयोग दे क्षेत्रें कोला

बी केई अगो ऐ। प्रधानमंत्री मोदी हुंदी सऊदी अरब दे क्राउन प्रिंस मोहम्मद बिन सलमान हुंदे नै बड़ी शैल बनतर ऐ ते दौनें लीडरें दी 2025 कोला पैहले बी 5 बारी मलाटी होई चुकी दी ऐ। 2023 च जी-20 सम्मेलन च शामिल होने लेई क्राउन प्रिंस भारत आए हे, जिस दरान दौनें मुखें बश्कार भारत पच्छम एशिया यूरोप गलियारे पर सैहमति बनी ही।

<><><><><><>श

US-Iran Talks

इटली दी राजधानी रोम अमरीका ते ईरान बश्कार परमाणु वार्ता दा दूआ गोड़ संपन्न होई गेआ ऐ। ईरान दे विदेश मंत्री अब्बास अरागची होरें आखेआ जे गल्लबात च प्रगति होआ करदी ऐ ते दौनें पक्ख किश गल्लें पर सैहमत होए न। सोशल मीडिया पोस्ट च उनें आखेआ जे सकारात्मक माहौल दे कारण मामले च प्रगति होई ऐ। वार्ता दा पैहला गोड़ पिछले हफते ओमान दी राजधानी मस्कट च होआ हा। त्रीए गोड़ दी वार्ता बी मस्कट च गै 28 अप्रैल गी होग।

<><><><><><>श

FM Visit

केन्द्री खजाना मंत्री निर्मला सीतारमण हुंदी अमरीका ते पेरु दी यात्रा अज्जै थमां शुरू होआरदी ऐ। ओह अमरीका दे सैन फ्रांसिस्को च दो दिनें तगर रूकगंन ते स्टैनफोर्ड विश्वविद्यालय दे हूवर इंस्टीट्यूशन च संबोधन देंगन। सीतारमण होर माली प्रबंधन ते सूचना प्रौद्योगिकी कन्नै जुड़े दे किश प्रमुख कंपनिं दे मुख कार्यकारी अधिकारिं कन्नै मलाटी करगंन। खजाना मंत्री भारतवंशिये कन्नै जुड़े देइक आयोजन च बी हिस्सा लेंगन। सीतारमण होर वाशिंगटन च 22 अप्रैल गी अंतर्राष्ट्रीय मुद्रा कोष ते विश्व बैंक दी बैठक च बी हिस्सा लेंगन। ओह जी-20 देश दे खजाना मंत्रिं दी दूई बैठक, केन्द्री बैंके दे गवर्नरें दी बैठक, विकास समिति दे पूर्ण सत्र ते ग्लोबल साम्वरन डेट गोलमेज सम्मेलन च बी हिस्सा लेंगन। सीतारमण होर 25 अप्रैल गी पैहली पैहली बारी पेरु दी यात्रा लेई उत्थें पुज्जगंन।

<><><><><><>श

PM-CS Day

प्रधानमंत्री नरेन्द्र मोदी होर कल नमीं दिल्ली च 17में सिविल सर्विसिस दिवस दे मौके पर लोक सेवके गी संबोधत करगंन। इस मौके ओह लोक प्रशासन च शानदार कारकरदगी

दस्सने आले 16 अधिकारिणं गी प्रधानमंत्री पुरस्कार कन्ने सम्मानत बी करगंन। एह पुरस्कार जिले दे पूरे पराते विकास, आकांक्षी ब्लाक कार्यक्रम ते नवाचार श्रेणिणं च दित्ते जांगन।

<><><><><><>श

Easter

अज्ज ईस्टर ऐ। मानता ऐ जे गुड फ्राइडे पर यीशू मसीह होरें गी सलीब पर चढ़ाए जाने दे बाद अज्जै दे ध्याड़े उंदी पुर्नजन्म होआ हा। अज्ज इस मौके पर गिरजाघरें च विशेष प्रार्थना सभा कीतियां जा'रदियां न। राष्ट्रपति द्रौपदी मुर्मू ते उपराष्ट्रपति जगदीप धनखड़ होरें ईस्टर दियां शुभकामनां दित्तियां न। अपने सनेए च राष्ट्रपति होरें आखेआ जे एह ध्यार निस्वार्थ, प्रेम ते सेवा दा संदेश दिंदा ऐ। तोआई उपराष्ट्रपति होरें आखेआ ऐ जे ईस्टर आशा ते नमेंपन दा प्रतीक ऐं

<><><><><><>श

IPL

आईपीएल टी-20 क्रिकेट च जंदी रातीं लखनऊ सुपर जायंट्स नै राजस्थान रॉयल्स गी दऊं रंजें कन्ने हराई दित्ता। जित्त लेई 181 रंजें दा लक्ष्य दे परते च राजस्थान रॉयल्स दी टीम 5 विकेटां मोआइयै 178 रंज गै बनाई सकी। राजस्थान आस्सेआ यशस्वी जायसवाल नै सब्बने शा मते 74 रंज बनाए। लखनऊ आस्सेआ त्रै विकेटां लैने आले आवेश खान गी प्लेयर ऑफ द मैच घोषत कीता गेआ। प्रतियोगिता च राजस्थान रॉयल्स दी एह लगातार चौथी हार ही। ओह अंक तालिका च 8में थाहर पर ऐ। प्रतियोगिता दे इक होर मैच च गुजरात टाइटन्स नै दिल्ली कैपिटल्स गी हराई दित्ता। जॉस बटलर दे नाबाद 97 रंज दी बदोलत गुजरात नै 204 रंजे दा लक्ष्य 20में ओवर च हासल करी लैता। गुजरात हुन अंक तालिका च सब्बने शा उप्पर ऐ जदके दिल्ली कैपिटल्स दूए थाहर पर ऐ।

<><><><><><>श